

414 **W**elt ir nû hoeren, ich tuon iu kunt,
 wâ von ê sprach mîn munt,
 daz lûter gemüete trüebe wart.
 geunêrt sî diu strîtes vart,
 5 die ze Schampfanzun tet Vergulaht,
 wan daz was im niht geslaht
 von vater noch von muoter.
 der junge man vil guoter
 von schame leit vil grôzen pîn,
 10 dô sîn swester, diu kûnegîn,
 in begunde vêhen.
 man hôrt in sêre vlêhen.
 Dô sprach diu juncvrouwe wert:
 »hêr Vergulaht, trûege ichz swert
 15 unt wære von gotes gebot ein man,
 daz ich schildes ambet solde hân,
 iwer strîten wære hie gar verzagt.
 dô was ich âne wer ein magt,
 wan daz ich truoc doch einen schilt,
 20 ûf den ist werdecheit gezilt.
 des wâpen sol ich nennen,
 ob ir ruochet diu bekennen:
 guot gebærde unt kiuscher site,
 den zwein wont vil stæte mite.
 25 den bôt ich vûr den ritter mîn,
 den ir mir sandet dâ her in.
Anders schermes het ich niht.
 swâ man iuch nû bî wandel siht,
 ir habt doch an mir missetân,
 30 ob wîplich prîs sîn reht sol hân.

daz l. g. getrüebet w. *G (nur GI)
 g. sî des st. v., *T (ohne V) (I O)

wandez (wandes T) was *T (ohne V)

dô (Die U) om. *T (nur T)

trûegich (vnde trûge ich O) sw. *T (L)

gar verdaget. *G *T

des w. wil ich n., *G (nur GI)
 diu erkennen: *T (O)

zw. volgt vil *T (O L)

a. schirmes hân ich n. *T (nur T)

pr. (kûsch I) ir r. *T (I)

*D: D *m: m *G: G I O L Z *T: T U V

1 Initiale D m I T U 3 Initiale O L Z 5 Initiale G 13 Initiale D T U 21 Initiale I 27 Initiale D

6 niht geslaht] ungeslaht *m (V) 7 noch] und *m (O) 14 ichz] ich *m 17 hie gar verzag] mich ([*]: hie V) gar verdaget *m (V) 19 doch] dô *m